

10 MAY 2003

MAHATHIR-JERMAN

HUBUNGAN ERAT DENGAN JERMAN SANGAT PENTING UNTUK PELABURAN, KATA DR MAHATHIR

KUALA LUMPUR, 10 Mei (Bernama) -- Perdana Menteri Datuk Seri Dr Mahathir Mohamad berkata Malaysia menghargai hubungan yang erat dengan Jerman memandangkan ia sebuah ekonomi utama dan salah satu pelabur terbesar Kesatuan Eropah di Malaysia.

Katanya, kebelakangan ini, perdagangan Malaysia dengan Jerman meningkat dengan banyaknya.

"Tahun lepas, pelaburan Jerman merupakan yang terbesar dari Eropah. Jadi, adalah penting bagi kita untuk mengadakan hubungan erat dengan Jerman," kata Dr Mahathir semasa menjawab pertanyaan mengenai lawatan Canselor Republik Persekutuan Jerman, Gerhard Schroeder ke Malaysia, mulai esok, pada sidang media selepas merasmikan Perhimpunan Agung Tahunan MIC ke-57 di sini hari ini.

Pada 2002, jumlah perdagangan bilateral antara Malaysia dan Jerman naik lima peratus kepada RM19.13 bilion berbanding tahun sebelumnya.

Dua bulan pertama tahun ini mencatatkan kenaikan yang ketara 33.18 peratus berbanding tempoh yang sama tahun lepas.

Selain pelaburan, Dr Mahathir berkata Jerman juga penting memandangkannya bersedia memindahkan teknologinya ke sini.

Lawatan Schroeder itu merupakan lawatan rasmi yang pertama pemimpin Jerman ke Malaysia dan membalas lawatan Dr Mahathir ke negara itu pada Mac tahun lepas.

Mengenai permintaan MIC untuk menaikkan pemilikan ekuiti masyarakat India Malaysia daripada 1.5 peratus sekarang ini kepada 3.0 peratus pada 2010, Dr Mahathir berkata, 1.5 peratus adalah munasabah memandangkan masyarakat India hanya terdiri daripada 10 peratus penduduk negara.

"Sebelum ini, tiada kepentingan ekuiti. Masyarakat Cina dan India adalah sama. Mengenai permintaan (presiden MIC) Datuk Seri S.Samy Vellu untuk memiliki ekuiti, kami menentukannya berdasarkan penduduk," kata beliau.

Dr Mahathir berkata meskipun Melayu merupakan 60 peratus daripada jumlah penduduk negara, kepentingan ekuiti mereka hanya 30 peratus. -- BERNAMA

SM MR NHD AHM